



Rabanus Maurus natione Germanus fuit. natus est enim in ciuitate Fuldensi, atq; à pueris in bonis literis educatus fuit. Inter alios auditor fuit Alcuini Anglici præceptoris Caroli Magni. postea adhuc iuuenis in monasterio Fuldensi monachum induit. ubi scribendo, legēdo, & disputādo talem se præstitit, ut quartus eius loci abbas omnium consensu electus fuerit. Ibi ouibus sibi commissis uerbo & exemplo uiginti quatuor annis præfuit, & penè infinita scripturarum opuscula composuit. Erat enim in diuinis scripturis eruditissimus, & in humaniorib. literis optimè institutus, ita ut philosophus, Rhetor, Astronomus, Poeta, & Theologus diceretur. Cui (ut Trithemius testatur) nec Italia si milēm, nec Germania æqualem peperit. Scripsit etiam in omnes & singulos sacrarum literarum libros eruditos commentarios, Naturam uniuersalē explicauit, & Computum Ecclesiasticum ordinauit. Id autem cū magna diligentia præstaret, quidam ex monachis ipsum odio prosequi cœperūt, calumniantes eum quod intempestiuīs studijs operam daret, atq; monasterij bona & iura negligeret, propterea improbitate eorum Rabanus offensus, cum ingratis hominibus diutius esse noluit, uerū monasterio relicto, sese ad Ludouicum Cæsarem Caroli Magni filium recepit. qui etiam ipsum liberaliter suscepit, & diu apud se retinuit. Cum autem postea monachos sui facti pœniteret, atq; per legatos ab eo peterent, ut in monasterium rediret, & suum officium reciperet, ipsis assentiri noluit, & apud Imperatorem permansit.